

Fundacion Autismo cerca Minister Paul Croes



DIA 2 di April ta dia di mundial di Autismo, un dia pa nos por conscientisa nos mes mas ariba esnan cu ta autista. Tin diferente nivel di autismo y nos mester siña reconoce nan y tambe yuda nan den enseñanza como tambe den comprende nan miho.

E calculo ta cu mas di 1000 persona na Aruba tin e condicion di Autismo.

Minister Paul Croes di asuntonan Social a ricibi Fundacion Autismo na su bureau, y a muestra e Fundacion cu e topico aki, lo tin prioridad pa su maneho e 4 aña nos dilanti.

“Ningun persona den nos sociedad por wordo discrimina a base di nan condicion. Nos mester crea mas conscientisacion den comunidad encuanto Autismo”, tabata palabranan di Minister Croes

Sra. Dilma Arends como presidente a expresa palabranan di gratitud pa Minister su apoyo expresa pa e Fundacion Autismo Aruba y ta contento cu Minister Croes tin e topico aki

asina cerca di su curason. Minister a muestra riba 4 punto sigur cu e lo desea di traha riba dje.

1. Minister kier mira un investigacion wordo haci na e cantidad di personanan autista na Aruba. 2. Minister Paul Croes lo busca acuerdo di cooperacion cu instancianan internacional pa apoya e fundacion aki na Aruba cu experticio riba e tereno aki.

3. Tambe lo haci esfuerzonan pa expertonan por apoya nos comunidad y principalmente leidsters pa reconoce na un edad mas hoben posibel e condicion autismo bou di muchanan.

4. Pa finalmente incorpora muchanan autista den nos sector di educacion (cu apoyo specifico). Alabes e Minister Croes a invita pueblo completo pa apoya e Fundacion Autismo den e caminata dia 2 di April 2014 pa 5:00 pm pa crea mas conscientisacion rond na Aruba. Esnan cu por ariba e dia aki bisti na blauw pa asina duna nan sosten na e grupo special aki.